


許起撰

霍亂燃犀



上海科學技術出版社

自序

於戲。霍亂而死者。可勝痛哉。夫霍亂。危急證也。霍亂而轉筋。則證之尤危。尤急者也。人一病之。生者少而死者多。大抵皆不死於霍亂。而死於治霍亂之醫藥者耳。僻處窮鄉。赤貧如洗。偶病霍亂。猶有活者。以無醫藥之害。或僅藉外治飲水。反不致十死八九矣。夫醫藥之害。豈易言哉。今之爲醫者。大半食古不化。指鹿爲馬。好爲大言。以欺人。開口傷寒論。動手四逆湯。鹵莽滅裂。似是而非。又有讀書不成。商賈無資。從游於庸惡陋劣之門。以訛傳訛。自以爲是。不識人命攸關。峻藥妄投。輕病轉重。重者轉爲不治。而一遇霍亂。不問是寒是熱。無不以丁附薑桂香燥溫熱之藥。服之而不死者。渺矣。病家亦以爲如此溫熱。而猶不能生。直霍亂者之命數耳。特未知醫藥之害。甚於霍亂。遂致孤人之子。寡人之妻。而人家並不咎諸醫藥。而爲醫者。能不動心乎。且是證也。每於夏秋之間。甚則流人似疫。合境皆然。而莫甚於去年。往往有滅門之染。謂非暑濕熱三氣之所釀。兼之醫藥之害。抑何至於斯極乎。余目擊病霍亂。而醫者之丁附薑桂。服之無不含冤而斃。每一念及。輒爲心痛。茲姑縷述前人名論如干。則是寒是熱。明若列眉。俾家置一編。庶幾人人盡知霍亂之原由。胸中早已澈底澄清。則斷不聽醫之模糊影響之談。而被丁附薑桂之害也。因名之曰霍亂燃犀說。斯說之是耶。非耶。天必知之。非也。天將奪我之算。而是也。天必假我數年矣。

請鑒此說者。拭目以俟。光緒十四年戊子午月。江左老瓠許起識於吳門
竿木第二盒

題辭

王翁著作等身。惟此霍亂燃犀說。人家性命攸關。尤屬緊要。非此刻
翠裁紅之句。爭勝才華音韻之詞。斯編一出。患者何幸如之。讀竟浮
一大白。并題兩絕於左。

病分寒熱路東西。識得東西路不迷。讀此編如知定向。南鍼不號號然犀。
然犀棒喝百千言。真諦分明要不煩。雖說浮生如短夢。豈容桎梏抱沉冤。

世愚弟楊引傳初稿

時疫流行歲不虛。無分城市與村墟。扁盧也要區寒熱。此是人間有用書。
此是人間有用書。許言霍亂義無餘。那知誣熱爲寒證。積習難反盜里閭。

世愚弟王韜拜題

余於典墳。頗喜泛覽。獨方書從未問津。茲王老親家出示所著霍亂燃犀
說。卒讀之餘。恍然比年來時疫顛連。半由誤治。亟促刊行。以挽末俗。

姻愚弟石鴻勳拜識

羨君妙術擅岐黃。賣藥餘閒著作忙。素秉婆心存濟世。更煩蓮舌別成方。
筆無滯象千言富。胸有靈犀一點藏。寒熱了然能洞見。斯編髣髴是慈航。

姻愚小弟朱以堦初草

荒謬推誰最。人間第一醫。死生若有命。藥石亦何爲。拋却丹山鳳。呼來白屋鷗。吾公深感慨。涕泣語時師。寒熱如冰炭。此編讀便知。參耆迷毒草。妄桂侮行尸。傷往縱難挽。追來尙不遲。亟刊行字內。免腐病人肌。

姪庭銓拜讀謹題

邇年夏秋間。每多弔腳痧與絞腸痧。卽霍亂轉筋與乾霍亂也。每多誤以夏月伏陰所致。熱藥妄投。輒遭夭橫。吾師特著霍亂燃犀說一編。憫含冤於既往。屏積弊於將來。誠濟世之寶筏也。

受業謝繼康百拜謹誌

霍亂燃犀說卷上

江左老瓠許起述

姪玉林男玉庭校
浙杭桂良傳重校

霍亂證。無論四肢厥冷。畏寒。舌白。一派陰寒氣象。畢呈顯露。若服丁附薑桂等藥。則百無一生者矣。須知霍亂。總以暑熱而成。有熱極似寒者。卽假寒也。所以徐靈胎有寒霍亂百不得一之說。

霍亂。非輕小證也。然治之偶合古法。竟有不藥而霍然者。如飲水單方刮刺之類。

霍亂有稱爲弔脚痧者。卽霍亂之劇而轉筋者。原非另有一證也。

霍亂有呼爲絞腸痧者。卽乾霍亂也。按方書自古以來。從無痧證之名。殆不知始於何時也。至醫說始載。葉氏用蠶退紙治痧之法。而江民瑩誤爲解脩證。雖爲杭莖埔所譏。然亦可見從前痧證不多。故古人皆略而不詳也。迨國初時。其病漸盛。自北而南。所以又有滿洲病與番痧之名。郭右陶著痧脹玉衡一書。推原極變。其說甚詳。而痧之證治乃備。張路玉復分臭毒番痧爲二者。蓋謂惡氣更毒於穢氣也。王晉三又辨痧卽外邪驟入。阻塞其正氣流行之道之謂。而痧之病義益明。至情志多鬱之人。稍犯涼熱。卽能成痧。且不時舉發。亦由氣血失其宣暢也。若乾霍亂。則亦有不因痰濕飲食之滯。但爲暑喝之氣擾亂於中者。當以新汲

水地漿等治之耳。

霍亂舉世皆名爲痧證也。王晉三曰。痧者。寒熱之濕氣。皆可以爲患。或四時寒濕凝滯於脈絡。或夏月濕熱鬱遏於經隧。或鼻聞臭氣而阻逆經氣。或內因停積而壅塞腑氣。則胃脘氣逆。皆能脹滿作痛。甚至昏憤欲死。西北人以楊柳枝蘸熱水鞭其腹。謂之打寒痧。東南人以油碗。或油線。括其胸背手足內腑。謂之刮痧。以碗鋒及扁鍼刺舌下指尖。及曲池委中出血。謂之搦痧。更服玉樞丹以治其內。是皆內外達竅。以泄其氣。則氣血得以循度而行。其脹卽已。實卽霍亂耳。非另有痧邪也。

霍亂有先吐瀉而心腹絞痛者。從穢氣而發者多。先心腹絞痛而吐瀉者。從暑氣而發者多。郭右陶之說也。瀉按。霍亂有吐瀉並作。有吐而不瀉。有瀉而不吐。有先吐後瀉。有先瀉後吐。總不外內停飲食。

外感暑穢。而鬱阻中宮。賊胃則先吐。賊脾則先瀉。故先心痛。然吐瀉之霍亂。乃暑穢者。則先吐。先腹痛者。則先瀉。心腹俱痛。吐瀉交作矣。

傷人氣分。宜用油鹽刮其皮膚。則痧不內攻。若心胸脹悶。腹中絞痛。或如板硬。或如繩縛。或如筋弔。或如錐刺刀割。雖痛極而不吐瀉者。名乾霍亂。乃邪已入營。宜以鍼刺出血。則毒有所泄。然後再審其因而藥之。若痧脹已極。難於刮刺者。又必先以藥救醒。乃可以回生。明此三法。庶可十全。

霍亂有素多濕滯而犯臭氣。則正氣鬱遏。腹痛乃作。或上連頭額俱痛。或下連腹腿俱痛。有痛死不知人。少間復蘇者。有腹痛不時上攻。水漿不入。數日不已者。甚至欲吐不吐。欲瀉不瀉。或四肢厥逆。面青脈伏。或遍

體壯熱面紫脈堅。但與生黃豆嚼之。覺香甜者。是臭毒也。急以燒鹽探吐。或以童便製香附四五錢爲末。煎湯頓服最效。世俗有用水搭肩背及臂者。有以苧麻水濕刮之者。有以瓷碗油潤刮之者。有以瓷鋒鍼刺委中出血者。總欲使腠理開通之意耳。其脈多伏。或細小緊澹。或堅勁搏指。中帶促結。皆是陰逆陽伏之象。不可誤認陰寒而投以丁附薑桂。雖砂仁之辛溫香竄。亦不可輕用。若見面青脣黑。脈勁搏指。厥逆喘促。多不可救也。

霍亂。以脾土濕盛。而滯其升降之機。則獨反厥逆於上。清反抑陷於下。雖有熱化寒化之分。必以治中焦之濕爲要領也。溫按。靈樞曰。清氣在陰。濁氣在陽。清濁相干。則爲霍亂。蓋因暑穢之氣。鬱滯中焦。使脾土阻而不能運動。氣陰遏而不得舒。居中既隔滯。勢必上逆爲吐。下奔爲瀉。苟不急治中焦之濕。則頃刻間三焦皆邪。陰陽乖舛。而病益劇矣。

霍亂者。揮霍悶亂。成於頃刻。變動不安之謂。邪在上則吐。邪在下則利。邪在中焦。上逆而爲嘔吐。復下注而爲利者。若久病上不能納。下不能禁。名曰吐利。不得謂之霍亂也。

霍亂。頭痛發熱。身疼。霍亂之表症也。而有寒熱之分者。以中焦上位。乃陰陽之交。而無一定之性。從陰化則爲寒。每因寒涼而病始發。冬月多有之。從陽化則爲熱。因暑熱而病始發。夏秋多有之。然因寒者。口必不渴。稍渴者。必屬於熱。仲景云。下利欲飲水者。以有熱故也。溫按。傷寒論有熱多欲飲水。寒多不用水之文。此言外感之證。有熱多寒多之辨。蓋外感熱邪入裏已多。所以口渴而喜冷飲也。

霍亂之發。每因吸受暑穢。或飲食停滯。遂至清濁相干。亂於腸胃。而爲上

吐下瀉。治宜宣土鬱而分陰陽。祛暑穢而行食滯。土鬱者。中焦濕盛而升降之機乃窒。諸鬱之發。皆從熱化也。

霍亂係因熱而成者。經云。不遠熱則熱至。熱至則身熱。吐下霍亂。奈病源三因等書。咸謂霍亂無不本之風冷。遂致薛立齋。張介賓輩。專主於寒。從此印定後人眼目。凡患熱霍亂者。皆被此數公殺之矣。如勞役田野之間。則暑熱自外而入矣。或安享膏粱之奉。則濕熱自內而生矣。是以不遠熱三字。亦非但以藥食爲言也。

霍亂一證。每發於夏秋之間者。正以濕土司氣。而從熱化耳。若其人中陽素餒。已土不勝濕。而復襲涼飲冷。則濕從寒化。而成霍亂者。亦有之。然熱化者。天運之自然。寒化者。他氣之所逆。知常知變。庶可以治霍亂焉。霍亂屬熱。內經文也。劉守真云。三焦爲水穀傳化之道路。熱氣甚。則傳化失常。而吐利霍亂。火性躁動故也。奈薛立齋之流。敢以寒多立論。貽誤後世。未窺至理。遠不如徐氏百不得一之識見耳。

霍亂有身熱煩渴。氣粗喘悶。而兼厥逆躁擾者。傷暑也。慎勿認作陰證。但察其小便必黃赤。舌苔必黏膩。或白厚。宜王孟英所製然照湯。澄冷服一劑。卽現熱象。此時若投丁附薑桂等藥。轉見渾身青紫而死矣。甚有手足厥冷。少氣。脣面爪甲皆青。腹痛自汗。六脈俱伏。而察其吐出酸穢。瀉下臭惡。便溺黃赤者。是熱伏厥逆也。熱極似陰。瀉。至真要大論。諸嘔吐酸。皆屬於熱。諸從衄上。皆屬於火。是也。急作地漿煎竹葉石膏湯服之。又有吐瀉後身冷如冰。欲沉欲

絕湯藥不下。或發噦。亦是熱伏於內。醫不能察。投藥稍溫。愈服愈吐。驗其口渴。以涼水與之。卽止。後以駕輕湯投之。脈漸出者生。然暑之爲病。傷之驟者。則發之暴。傷之漸者。則發之緩。故九月時候。猶多伏暑霍亂之證。

霍亂。以暑氣入腹。惡心腹痛。上吐下瀉。瀉如水注。張鳳達曰。春分以後。秋分以前。少陽相火。少陰君火。太陰濕土。三氣合行其政。故天之熱氣下地之濕氣上。人在氣交之中。受其蒸淫之氣。由口鼻入而擾其中。遂致升降失司。清濁不分。所瀉者。皆五臟之津液。急宜止之。非通因塞用之謂也。濕甚者。胃苓湯分利陰陽。暑亦自去。熱甚者。桂苓甘露飲清其暑火。濕亦潛消。若火甚之體。內本無濕。而但吸受暑邪者。白虎湯之類宜之。蓋臟性有陰陽之別。陰虛者火旺。雖病發之時。適犯生冷。而橘櫟等。僅宜暫用。陽虛者濕勝。雖寒潤之品。非其所宜。如胃苓湯。已爲合法。縱或體氣極弱。亦不過補氣清邪並用。若因其素秉之虛。而忘其現病之暑。進以丁附薑桂之劑。真殺人而不轉睫矣。

霍亂之轉筋。尤在經曰。肝主筋。上應風木。肝病生風。則爲轉筋。其人臂脚直。脈上下行。微絃。經云。諸暴強直。皆屬於風也。轉筋入腹者。脾土虛而肝木乘之也。按薛一瓢以轉筋與痙證同。推義亦本此。原病式云。轉筋戾也。熱氣燥燥於筋。則攣瘰而痛。火主燔灼。躁動故也。臨按。內經云。諸轉反戾。皆屬於火是也。或以爲寒客於筋者。誤也。蓋寒主收引。然止爲厥逆禁固。屈伸不利。安

得爲轉也。所以轉者。動也。陽動陰靜。熱證明矣。夫轉筋者。多由熱甚。霍亂吐利所致。以脾胃土衰。則肝木自盛。而熱爍於筋。故轉筋也。夫發渴則爲熱。凡霍亂轉筋而不渴者。未之有也。張路玉曰。嘔吐泄瀉者。濕土之變也。轉筋者。風木之變也。濕土爲風木所尅。則爲霍亂轉筋。平胃散加木瓜主之。有一毫口渴。即是伏熱。種種燥熱之藥。誤服卽死。雖五苓散之桂。亦宜酌用。仲聖雖立熱多欲飲水者。五苓散主之之法。然上文有頭痛惡寒之表證。所以仍取兩解之義。是桂枝原爲兼有風寒者而設。故雖兼表證而非風寒之邪。或本無表證而內熱甚者。豈可拘泥成法。不知變通。而徒藉聖人爲口實哉。凡霍亂轉筋。脈爲兼弦。正以木旺而侮其所勝也。濕盛者。平胃散加木瓜可矣。火盛者。木瓜湯送左金丸爲宜。王孟英因雞矢白散之意。而立蠶矢湯一方。屢收奇績矣。

霍亂。又有感惡毒異氣所致者。卽張路玉所謂番痧證也。卒然昏倒。腹痛。面色黑脹。不呼不叫。如不急治。兩三時卽斃。腹痛麻脅。嘔惡神昏者。或穢穢汗出。或隱隱發斑。此毒邪熾發於表也。有發卽瀉利。厥逆腹脹。無脈者。此毒邪內伏也。所患最暴。多有不及見斑而死者。初覺卽以蕎麥。焙燥去殼。取末三錢。溫湯調服。重者。少頃再服。卽安。蓋蕎麥能鍊腸胃。滓穢降氣寬胸。而治濁滯。而痧毒之專藥。其毒甚面黑者。急砭委中穴。去黑血以泄毒邪。蓋驟發之病。勿慮其虛。非此急奪。束手待斃。倘無蕎麥。或服之不應。卽宜理氣爲先。如香蘇散加薄荷荊芥。辛涼透表。次則

辟邪爲要。梔子豉湯加牛蒡生甘草。解毒安中。表熱勢甚。清熱爲急。黃芩湯加連翹木通。分利陰陽。斑點深赤。急用羌蔚湯下其血分之毒。如見煩擾腹脹。脈來數疾。急投涼膈散。如局方以竹葉易生薑。則毒從下奪。熱劇神昏。雖合三黃。多不可救。煩渴引飲。遺尿。速清陽明。白虎湯加葱豉。使毒從表化。以上諸法。在未經誤藥。庶可挽回一二。

列方

地漿

千金

治乾霍亂及霍亂轉筋。

掘黃土地作坎。深三尺。以新汲井水沃入。攪濁。少頃。取清飲三五盞。即愈。大忌米湯。

羅謙甫曰。霍亂乃暑熱內傷。七神迷亂所致。陰氣靜則神藏。躁則消亡。非至陰之氣不愈。坤爲地。屬陰土。曰靜順。地漿作於陰地。坎中爲陰中之陰。能瀉陽中之陽也。王孟英謂。得羅氏此言。治霍亂已思過半矣。蔣式玉稱其勤求古訓。信不誣也。按霍亂因無形之邪。由口鼻吸入肺胃之絡。而阻其氣道之流行。乃否塞不通之病。或清不能升。而泄瀉無噍。濁不能降。而腹痛嘔吐。故用藥皆以清涼宣暢爲法。凡周時內。一口米湯下咽。卽脹逆不可救者。蓋以穀氣入胃。長氣於陽。沉煎成湯液。尤能閉滯經絡也。薑湯熱湯。飲酒澡浴並忌者。爲其能助熱氣上衝也。若吐瀉既多。元氣耗散。內已無邪者。須以清米湯涼飲之。以爲接續。不可禁之太過。而反致胃氣之難復也。

陰陽水 本草綱目 治霍亂吐利。

新汲水 百沸湯

各半和服。

李瀕湖曰。上焦主納。中焦主腐。下焦主出。三焦通利。陰陽調和。升降周流。則臟腑暢達。一失其道。二氣淆亂。濁陰不降。清陽不升。故發爲霍亂吐利之病。飲此卽定者。分其陰陽。使得其平也。

冬瓜湯 王夢英 治霍亂大渴。

冬瓜 去皮瓢

水煎清湯。俟涼。任意飲之。

按永類鈴方。用陳倉米作湯。今改用冬瓜湯。其功更勝。蓋陳倉米雖能清熱。霍亂平後。用之頗爲得宜。若邪勢方張。吐下未平之際。服之猶嫌其守。惟冬瓜甘淡微涼。極清暑熱。無論病前病後。用以代飲。妙不可言。卽溫熱病。用之亦良。

救急良方 外臺 治暑熱霍亂。吐瀉轉筋。

新汲水

以一碗冷飲之。外以一盆盛水。浸兩足。忌食熱物。

療霍亂代穀食方

蕎麥 焙燥去殼。磨粉。不拘多少。

右沸湯調熟。候溫服之。蓋蕎麥性能鍊腸胃滓穢。降氣寬胸。而治濁滯。

爲痧毒之專藥也。瀰按。楊氏簡便方。絞腸痧痛。用蕎麥麵一撮。炒黃。水烹服。李時
風。視爾如故。毛傳云。絞。芘芽也。爾雅。絞。蚘。郭註云。今荆葵也。似葵紫色。謝氏
云。小草。多華少紫。葉又翻起。邢疏。舍人云。絞。一名蚘。陸機云。荆葵。似蕪菁。華紫
綠色。可食。微苦。本草載。蕎麥莖弱而翻。然易長
易收。磨如麥麵。又白居易詩云。蕎麥鋪花白是也。

金莖露 顧聖符 治霍亂轉筋

扁豆葉一握

搗絞汁一碗飲。瀰按。扁豆葉。別錄曰。治霍亂吐下不止。蘇恭亦曰。吐利後轉筋。用生
扁豆葉一把。搗汁。入酢服立痊。葉天士種德堂霍亂門中。亦選此方。

傷暑霍亂方 包瑞霖

絲瓜葉 一斤 白霜梅肉 一錢并核
中仁用

研爛新汲水調服立痊

外治轉筋方

轉筋起於足腓。俗呼
腿肚但以好燒酒摩擦其硬處。軟散即愈。一法作極

鹹鹽湯於槽中煖漬之。一法以省頭草同炒鹽擦之亦良。一法以

棉絮浸酒中煎滾取出乘熱裹之。一法以醋煮青布揜脚膝冷復易

之。一法令病人偃臥將膝腕內以手蘸溫水輕輕急拍直待紫紅筋

現起。即郭右陶所
謂痧筋。用瓷鋒刺出血立愈。並治乾
霍亂。此名委中穴在膝後對面。

刮法 郭右陶 治霍亂痧脹乾霍亂

背脊頸骨上下及胸前脇肋兩背肩臂用銅瓷蘸香油刮之或用刮舌

則子脚蘸香油刮之頭額腿上用棉紗線或麻線蘸香油刮之大小復

軟肉處用食鹽以手擦之。按張會卿曰凡毒深病急者非刮背不可。

蓋以五臟之系咸附於背也。又須自輕而重。向下刮之。則邪氣亦隨之而降矣。

刺法同上 治乾霍亂痧脹。

嘗覽古人遺書。東南卑濕之地。利用砭。今以鍼刺出血。即用砭之道也。凡霍亂痧脹。邪已入營。必有青筋紫筋。或現於數處。或現於一處。須用銀鍼刺之。去其毒血。然後據證用藥。看其腿彎上下。有細紫深青色。或紫色。或深紅色者。肌膚白嫩者。方有紫紅色。卽是痧筋。刺之。方有紫黑毒血。其腿大筋不可刺。刺亦無毒血。反令人心煩。腿兩邊硬筋上筋不可刺。刺之恐令人筋弔。若臂彎筋色亦如此辨之。其餘非親見不明白。故不具載。至如頭頂心一鍼。惟取挑破。略見微血。以洩痧毒之氣而已。不可直刺。其指尖刺之太近指甲。雖無大害。當令人頭眩。卽一應刺法。不過鍼鋒微微入肉。不必深入。按乾霍亂。因毒邪入於營分。周身隧絡爲之壅塞。故又謂之痧脹。失治卽死。唯用鍼刺。砭去惡血。取效最捷。益母草萊菔汁之治番痧。皆取其能散惡血也。卽古方探吐。以燒鹽和熱童便。雖云性專潤下。亦爲其涼血之功有獨擅耳。唯腹雖痛極而喜得溫按。脣口刮白者。乃內虛陰寒之病。慎毋誤用清涼。妄施鍼刺。而遺人夭殃也。

羌蔚湯

治乾霍亂。腹痛驟發。深赤斑毒。俗呼爲番痧。

益母草

以水濃煎。少投生蜜。

或可不用。

燉溫忒服。取效。或加生萊菔汁半杯良。

燃照湯

孟英

治暑穢挾濕。霍亂吐下。脘痞煩渴。外顯惡寒肢冷者。

草果仁

淡豆豉

醋炒半夏

佩蘭草

製厚樸

黑山梔

酒炒黃芩

滑石

水煎涼服。

連樸飲

同上

治濕熱內伏之霍亂。兼能行宿食。滌痰涎。

川連

醋炒半夏

香豉

川樸

石菖蒲

黑山梔

水煎服。

梔子豉湯

傷寒論

治暑熱霍亂之主劑。兼解暑證。誤服附桂而致殆者。

梔子

香豉

水煎服。

按此傷寒吐劑也。王孟英治熱霍亂。獨推以爲主劑。蓋梔子苦寒。善泄鬱熱。豉經蒸腐。性格和中。凡霍亂皆由濕鬱化熱而擾攘於中宮。唯此二物最爲對症良藥。奈昔人咸未之察也。且二物之奇。匪可言罄。如偶以竹葉清暑風。配以蔻仁宣穢惡。濕甚者臣以滑樸。熱勝者佐以芩連。同木瓜扁豆則和中。合甘草鼠粘而化毒。其有誤投熱藥而致躁亂昏沉者。亦必藉此以爲解救。厥功懋矣。而古人之治霍亂者。從不錄用。豈非一大闕典耶。

六一散

即益元散又名天水散

河間治暑熱霍亂。

滑石

甘草

爲粉。水飛。每服三錢。新汲水下。

左金丸

丹溪

治霍亂轉筋。火邪內熾。

黃連

吳茱萸

爲末。米飲爲丸。如梧子大。每服三錢。以陳木瓜五錢煎湯下。此證因濕盛。而風木行脾者。石頑主平胃散加木瓜矣。若熱勝而火爍於筋者。孟英獨推是方爲妙。張雨農極爲首肯云。嘗在京師。見杜石樵少宰。亦以此藥救活多人也。然昔賢皆未采用。何左金丸之蹇於遇乎。

蠶矢湯

孟英

治霍亂吐利。轉筋腹痛。口渴煩躁。危急之症。

晚蠶沙

川連

大豆卷

酒炒黃芩

苡仁

木瓜

吳茱萸

醋炒半夏

黑山梔

通草

以陰陽水煎。稍涼徐服之。

解毒活血湯

同上

治溫者痧邪深入營分。轉筋吐下。肢厥汗多。脈伏瀰無。

口渴腹痛。面黑目陷。勢極可危之證。

連翹

淡紫萊

川連

益母草

生苡仁

絲瓜絡

石菖蒲

蠶沙

地丁

銀花

水煎。入生藕汁。或茅根汁。或加白童便。

黃芩定亂湯

同上

治溫病轉爲霍亂。腹不痛而肢冷脈伏。或肢不冷。而口

渴苔黃。小水不行。神情煩躁。

黃芩

黑山梔

醋炒半夏

蒲公英

蠶沙

淡豆豉

陳皮

川連

吳萸

陰陽水煎服。轉筋加生苡仁絲瓜絡。痢行者加木瓜。濕盛者加連翹茵陳。

昌陽瀉心湯

同上

治霍亂後。胸前痞塞。湯水礙下。或渴或呃。

石菖蒲

半夏

川連

竹茹

蘆根

蘇梗汁

黃芩

川樸

枇杷葉

水煎服。如小溲秘澀者。加紫苑。按昌陽者。能掃滌濁邪。而昌發清陽之氣。

駕輕湯

同上

治霍亂後。餘邪不清。身熱口渴。及熱邪內伏。身冷脈沉。湯藥

不下而發呃。

鮮竹葉

黑山梔

金石斛

省頭草

冬桑葉

淡豆豉

生扁豆

陳木瓜

水煎服。

致和湯

同上

治霍亂後。津液不復。喉乾舌燥。小水短赤。

北沙參

枇杷葉

生扁豆

木瓜

陳倉米

麥冬

鮮竹葉

生甘草

金石斛

水煎服。

黃連香薷飲

活人

治暑熱霍亂。